

REGIONAL NEWS

HEADLINES:-

1. Naktip ni 19-a Lok Sabha member thlang tura vote thlak turin inbuatsaihna peihfel thawkhat a ni a, political party te campaign theih hun pawh vawiin tlai dar 5 khan a tawp a ni.
2. Lok Sabha member thlanna vote thlak huna hmun hla zuala duty tur te chuan vawiin khan an dutyna tur hmun an pan .
3. Lok sabha seat 102 awmna, state leh UT 17 a inthlan campaign chu vawiin khan a tawp.
4. US chuan Iran-in missile leh drone program a kalpui avangin a hrek belh dawn.

<><><>

CAMPAIGN ENDS

Naktip ni 19-a Lok Sabha member thlang tura vote thlak turin inbuatsaihna peihfel thawkhat a ni a, political party te campaign theih hun pawh vawiin tlai dar 5 khan a tawp a ni.

Mizoram CEO thuchhuahin a tarlan danin vawiin tlai dar 5 atanga vote thlak ni, Zirtawpni tlai dar 5 thleng, darkar 48 chung chu silence period kalpui tur a ni a. Hemi hun chung hian TV leh electronic media bakah social media-ah te inthlan kaihnawih thil tarlan leh tihchhuah khap a ni a. Inthlan kaihnawiha inkoh khawm leh thusawi khap a nih bakah inthlan kaihnawiha mipui intihlimna, enawm leh hlimhlawpna engmah buatsaih phal a ni lo a. Candidate leh political party te'n press conference leh interview an huaihawt phal a ni lo a. Thupek zawm lo te chu kum 2 thleng lungin tan tir emaw, lei chawi tir emaw, a pahniha hrem theih an ni.

Thuchhuahin a tarlan danin silence period chungin aurinna hman khap a ni a. Mizoram pawn atanga lo kal political party aiawh leh candidate campaign puitute chu silence period a intan hnuah chuan Mizoram parliamentary constituency huamchungah vote an nei a nih loh chuan Mizoram an chhuahsan tawh tur a ni a. Silence period chung hian Flying Squad Team, Static Surveillance Team, leh adangten dan bawhchhia an awm leh awm loh an fang kual reng dawn a.

Silence period chu mipuiten rilru fim tak leh ngaihtuahna thiang an neih theih nana ruahman a nih thu leh, he hun hi tha taka zawm a nih theih nan candidate te leh political party te pawh mahni inthunun tura beisei an nih thu Mizoram CEO thuchhuah chuan a tarlang bawk a ni.

<><><>

POLLING PARTIES

Naktip-a Lok Sabha member thlanna vote thlak huna hmun hla zuala duty tur te chuan vawiin khan an dutyna tur hmun an pan a, a tam zawk chu naktuk khian an duty na tur hmun an pang thung ang.

Tukin khan Lunglei district hnuai khaw hla zual leh kalkawng harsa zuala kal tur polling party 13 te chu Pi Ramdinliani, District Election Officer leh bawrh sap Lunglei district ni bawk chuan a vai liam a.

Polling party te hu Thorang biala khaw 7 ;ej West Tuipui biala khaw 6 a kal tur te an ni.

Mamit district chhunga Polling Station 121 zinga polling station hla zual leh lirthei (motor) kal theih lohna polling station 39 a duty turte pawh vawiin khan an chhuak tan a.

Mamit district chhungah hian polling station 121 awmin chung zinga polling station 39 te chu hmun hla zual leh kal pawh harsa an ni a, heng polling station 39 zingah hian polling station 4 - Bajirungpa, Kananthar, Zopui leh Chilui te chu ke a kal ngai niin polling station 2 - Dilzawl leh Tlangkhang polling station te chu Lawngleng hmanga kal ngai an ni thung a ni. Tin Sotapa polling station chu lirthei kal theih nimahse ruahsur chuan ke a kal ngai tur a ni thung a ni.

Vawiin a polling station 39 a duty tur te hi Hachhek bial polling station 9, Dampa bial polling station 20 leh Mamit bial polling station 10 a duty tur polling party te an ni.

Lawngtlai District chhunga polling station 181 zinga Lawngtlai ațanga hla zual polling station 116-a duty tur polling party-te chuan vawiin khan Government Lawngtlai College ațangin an duty-na tur hmun an pan a. Sector bial then viltu tur sector magistrate 15 chuan an duty-na tur hmun an pan ve nghal bawk.

Polling Party kal chhuak turte hian Government Lawngtlai College-a Dispatch & Receiving Counter ațangin inthlan buatsaihna tur hmanrua leh bungruate lam khawmin, strong room ațangin EVM leh VVPAT an la chhuak a. An bungruate an endik fel vek hnuah an duty-na tur hmun panin an chhuak a. Polling party kal chhuakte hi Lawngtlai District Election Officer Pu Cheemala Siva Gopal Reddy chuan Government Lawngtlai College tual ațangin a vai liam.

Vawiin hian Tuichawng assembly biala polling station 70-a polling party-te chuan an zavaiin an duty-na tur hmun an pan nghal vek a. Lawngtlai West biala polling station 69 awm zinga polling station 32-a polling party-te chuan an duty-na tur hmun panin, Lawngtlai East biala polling station 42 awm zinga polling station 14-a polling party-te chuan an duty-na tur hmun an pan ve bawk a. Tuichawng bial chhunga sector magistrate 11, Lawngtlai West bial chhunga sector magistrate 3 leh Lawngtlai East biala sector magistrate 1 chuan an bial (sector) an pan ve nghal bawk.

><><>

POL PARTY CAMPAIGN

Vawiin tlai dar 5-a political party campaign hun tawp tur hmakhalhin, political party tin te chuan vawiin khan uar takin vote an zawng a,

Union Finance Minister Nirmala Sitharaman pawhin vawiin khan Siaha langin a tlawh a, Siaha khawpuia vantlang inkhawm ah thu sawiin hemi zawh hian tlawmngai pawl hrang hrang, kohhran te leh MDC lam hmu in hemi zawh hian Aizawl Lengpui Airport ah thuthar thehdarhtute a kawm a ni.

Finance Minister chuan ramria Myanmar nena zalen taka inkalpawhna chu Ramchhunga himna ngaih pawimawh anih avangin khar rih ani a ti a, India chu thenawm ram te nen inkungkaihna tha tak an nei tih sawiin vawiina a tlawh Siaha pawh ramri-a awm anih avangin hmasawn zel turin theihtawp chhuah ani dawn a ti.

ZPM Party leh MNF Party chuan vawiin khan Aizawlah-ah hun cvampaign kharna inkhawm an buatsaih ve ve a,

Vanapa Hall ZPM inkhawmah Chief Minister Pu Lalduhoma chuan thu a sawi a, Ni 100 programme an duan chu an minister ten an ti zo thei vek a. Thil tha ni a an hriat an ti a, a tha lo an ti lo mai a, chu chu a formula chu a ni a ti.

Vanapa Hall tuala MNF Party campaign kharna inkhawmah MNF Treasurer, Pu Lalruatkima mi zawng zawng vote thlak turin a sawm a, an campaign chhungin Mizoram Assembly Bial 40-an tlawh chhuah vek thu a sawi a ni.

Political Party hrang hrangte hian vawiin khan Press Conference kovin an hmalakna hrang hrang te an sawi a, MPCC pawhin Press Conference hi kovin Mizoram hmasawna tura an hmahlir te an sawi a ni.

<><><>

AYUSH

Mizoram Sorkar Ayush Directorate hnuai National AYUSH Mission chuan an Programme pakhat zing a mi AYUSHGRAM programme hmingin Mizorama AYUSH Health and Wellness Centres 41 zingah Centre 14 thlan bikah inentirna hun a kalpui mek a ni a.

Vawiin khan Directorate of AYUSH a hotuten Lawngtlai Dist a Parva – III kalchilhin Parva-III Community Hall ah Free clinic te, AYUSH Awareness programme te leh physical and stress management chungchang te kalpui a ni a, damlo mi 184 te hriselna dinhmun an enfiah.

Hetiang hun hi Khawmawi, Thenhlum, Hliappui, Ruantlang leh Vaphai ah te neih chhonzawm leh a ni ang.

AYUSHGRAM Programme hi Theiriat, Thuampui, Chawngte C, Chapi, Noaotlah, Paithar, Tuithumhna, Damdep ah te neih tawh bawk a, damlo in entir zawng zawngte hnenah damdawi a thlawna sem vek thin a ni.

Parva – III Village Council leh YMA hruaitute chuan lo dawngsawngin, an khaw chungah Free Clinic neih a nih chu an lawm hle tih kan corr an hrih a ni.

<><><>

ELECTION

Lok sabha seat 102 awmna, state leh UT 17 a inthlan campaign chu vawiin khan a tawp.

Inthlanna tur bial te hi Tamil Nadu-ah seat 39, Rajasthan ah 12, Uttar Pradesh ah pariat, Madhya Pradesh ah paruk, Uttarakhand, Assam leh Maharashtra ah panga theuh, Bihar ah pali, West Bengal ah pathum, Arunachal Pradesh, Manipur leh Meghalaya ah seat hnih theuh leh Chhattisgarh, Mizoram, Nagaland, Sikkim, Tripura, Andaman and Nicobar Island, Jammu and Kashmir, Lakshadweep leh Puducherry ah pakhat theuhte an ni a.

Heng bakah hian Arunachal Pradesh leh Sikkim ah te Assembly inthlan neih nghal a ni ang.

<><><>

4TH PHASE OF LS

Lok sabha inthlan thawh lina atana hriattirna chu naktukah tihchhuah a ni dawn. Inthlan thawh 4-naah hian state pakua leh Union Territory pakhata Lok Sabha seat 96 ah inthlan a ni dawn a.

Inthlan thawhlinaah hian Andhra Pradesh ah seat 25, Telangana ah 17, Uttar Pradesh ah 13, Maharashtra ah 11, Madhya Pradesh leh West Bengal ah 8 ve ve, Bihar ah panga, Jharkhand leh Odisha ah pali leh Jammu and Kashmir ah 1 an ni a.

Tun thla ni 25 thleng inthlan chuh turte tan hming theluh theih a ni a. May ni 13 ah vote thlak a ni ang.

Lok Sabha inthlan thawhnihna rual hian Andhra Pradesh Assembly inthlan leh Odisha Assembly inthlan thawh khatna neihna tura hriattirna tihchhuah ve nghal a ni ang.

<><><>

US SANCTION

US chuan Iran-in missile leh drone program a kalpui avangin a hrek belh dawn. White House thupuangtu sawidanin President Joe Bidena chuan kar hmasaa Iran-in Israel a kah avang khan hrekna hi a tih belh dawn a. President Bidena hian a thawhpui leh tanrualpuite nen inbiain hrek dan tur an ngaihtuah niin US National Security Adviser chuan a sawi a. Heng a biak zingah hian G7 ram hrulaitute pawh an tel a ni.

<><><>